




**SALUD MENTAL NA ARUBA:
ASOCIACION PSICOLOGO
ARUBANO UNI (PAU) TA BATI
ALARMA RIBA CRISIS CRECIENTE
DEN NOS SOCIEDAD**



WWW.SOLODIPUEBLO.COM



SOLODIPUEBLO@GMAIL.COM

**E YABI DI
NOS CAS
DEN MAN DI
HULANDA:**



KICO HOFA TA NIFICA PA BO ??

El a bisa cu mester tene cuenta cu
estado mental di e acusado

**ABOGADO DI SOSPECHOSO
HACKER TA HAYA CASTIGO
EXIGI MUCHO HALTO**

Durante tratamiento
di e caso penal

**NA YORAMENTO DOS DAMA
VICTIMA DI HACKING Y
CHANTAGE A EXPRESA E DRAMA
CU NAN A PASA ADEN**

**REFLEXION RIBA E
CELEBRACION DI 50 AÑA DI
HIMNO Y BANDERA Y 40 AÑA
DI STATUS APARTE ARUBA SU
HISTORIA MERECE RESPET**





EL A BISA CU MESTER TENE CUENTA CU ESTADO MENTAL DI E ACUSADO

ABOGADO DI SOSPECHOSO HACKER TA HAYA CASTIGO EXIGI MUCHO HALTO

ORANJESTAD – Despues di a scucha Fiscal exige 5 aña di prison pa e homber D.E., abogado mr. Illes, a reacciona fuerte.

SOLO DI PUEBLO por a compronde cu e abogado ta haya cu mester declara D.E. liber di violacion y cu e castigo exige pa Fiscal ta mucho halto.

CASTIGO TA MUCHO HALTO

Mr. Illes a bisa Hues cu e ta haya e exigencia di Fiscal mucho halto. E

abogado a bisa cu Fiscal no a tene cuenta cu e situacion mental di D.E., manera psicologo y psiquiatra ta muestra.

E abogado a bisa cu D.E. a bisa Hues cu e tabatin relacion sexual cu e dama S. y cu esaki tabata cu aprobacion di S. E abogado ta haya cu no tin prueba di violacion y mester declara D.E. liber y cu e demanda di daño di e dama S., mester wordo poni un banda. E abogado ta haya cu e demanda di S. ta asina compleho pa wordo trata

den un caso penal. E ta haya un caso civil na su lugar.

NO A HACK

E abogado a bisa Hues cu D.E. no tin conocimiento di hack account manera Fiscal ta bisa. E ta haya cu mester declara D.E. liber pa esaki. E abogado a bisa cu D.E. ta admiti di a haci malo y mester haya castigo. Na opinion di e abogado, Hues mester tene cuenta cu raport di psicologo y psiquiatra kendenan ta muestra cu door di e

problema mental di D.E., e ta menos responsabel pa loke el a haci.

VIGILA PA NO MATA CURPA

Mr. Illes a bisa Hues cu den KIA, D.E. ta bou vigilancia special pa no mata curpa. E abogado a sigui bisa cu den KIA, D.E. no ta haya e tratamento adecua. E ta haya cu Hues mester tene cuenta cu e caso a dura masha hopi, promer cu e caso a bin dilanti.

MERECE TRATAMENTO E abogado ta haya cu

tambe Hues mester tene cuenta cu D.E. merece di haya tratamiento. Tur esaki abogado ta haya cu mester reduci e castigo exige pa Fiscal. Na opinion di mr. Illes, castigo di prison ta tene D.E. riba un pause cu e no por haci nada, pero tratamiento ta trece cambio den su comportacion.

Hues a sera tratamento di e caso y a bisa cu e mester mas tempo pa studia e caso. El a bisa cu 24 April 2026, e lo sera tratamento di e caso y di biaha lo tin sentencia.

Durante tratamiento di e caso penal NA YORAMENTO DOS DAMA VICTIMA DI HACKING Y CHANTAGE A EXPRESA E DRAMA CU NAN A PASA ADEN

ORANJESTAD – Dos dama victima di e sospechoso D.E. pa hacking y chantage, a expresa nan mes. Un di e damanan, e dama S., hasta tabata e victima di violacion.

SOLO DI PUEBLO por a compronde cu e expresionnan di S. y T. a afecta tur presente den Corte.

VICTIMA DI VIOLACION A KEDAAFECTA

E dama S., bibando na Hulanda, via video conference a sigui e caso. Por a mira cu S. tabata acompaña pa un amiga, kende tabata consola

S. kende cada rato tabata yora, ora cu Hues tabata interroga D.E. riba e violacion di S.

Na dado momento, Hues a bay over na e demandanan di daño. Ta asina cu e dama S. y e dama T. a haci uso di e derecho di expresa nan mes. E dama S. a manda un carta y Hues a lesa esaki den Corte.

Den su carta, S. ta muestra cu door di e chantage di D.E., e ta sinti hopi kibra y cu e ta wordo domina. E stalking a perhudica S. hopi y cu el a bira hopi depresivo. El a keda afecta y no por actua normal. Tur esaki a perhudica S.

den su estudio na Hulanda. El a pidi Hues pa haci husticia pa tur loke el a pasa aden pa un periodo largo. S. a bisa den e carta cu e ta spera cu esaki no pasa cu ningun hende. El a demanda 28.674 florin cu ta encera gastonan cu e mester a haci pa tratamento psicologico y medicamento.

Ta asina cu e gastonan ta sigui ainda. E hacking y chantage di D.E., a perhudica S. den su estudio. E financiamiento di e estudio cu tabata calcula pa 1 aña a bira 2 aña. A lo largo, S. lo mester paga mas y lo tarda un aña mas promer cu e por cuminsa traha. S.

a demanda mas cu 84 mil florin na daño inmaterial. Esaki pasobra e ta sinti su mes insegur, door di e hacking y chantage di D.E.

VICTIMA KIERA MATA SU MES

E dama T.(26), hopi emociona a bisa cu desde su 21 aña, e tabata victima di D.E. Na yoramento el a bisa cu durante 2 aña of mas, D.E. a causa angustia y menaza na dje door di hack. Na yoramento el a bisa cu door di menaza, e tabatin miedo cu e lo perde tur cos. E tabata sinti berguena y a bay biba na Hulanda siendo cu su oma ta malo na Aruba.

El a bisa cu te awe e ta sinti dolor ora e pensa riba e caso aki caminda e tabata sinti cu e tabata wordo usa y D.E. tabata hari y no a pensa pa stop y tabata sigui.

T., hopi emociona a bisa cu na dado momento e tabata kier a mata su mes. El a bisa cu e no

tabata kier mira su mes riba potret pasobra e no ta reconoce su mes.

El a bisa cu e no tabata por a come y tabata sinti su mes hopi malo. T. a bisa cu despues cu D.E. a wordo deteni, D.E. a manda mensahe cu husticia lo no por haci nada. Despues D.E. a bay manda mail pa doño di trabao di potretnan di T. Esaki a causa cu doño di trabao a subi seguridad na trabao mirando e seriedad di e caso y pa proteha T. y otro empleadonan. Tambe D.E. a mail potretnan pa e pareha di T. y e mayornan di T.

T. a bisa Hues, tur esaki door cu D.E. no a mantene su mes na e prohibicion di Hues Comisario pa no tin contacto cu T.

T. a expresa na Hues: “Nos como victima mester keda biba pa henter bida cu e menaza di D.E. Por a nota cu e victima S. tambe tabata y

Parlamentario Xiomara Maduro: REFLEXION RIBA E CELEBRACION DI 50 AÑA DI HIMNO Y BANDERA Y 40 AÑA DI STATUS APARTE ARUBA SU HISTORIA MERECE RESPET

E celebracion di 50 aña di nos Himno y Bandera y 40 aña di Status Aparte tabata un oportunidad unico pa honra nos historia y unifica nos pueblo. Pero en bes di unidad, hopi hende a keda cu un sabor amargo.

Tin un percepcion cla cu Mike Eman a dirigi e celebracionnan den un direccion selectivo. Ela concentra tur celebracion riba un solo famia, su famia, mientras cu e rol fundamental di Betico Croes a wordo minimisa of ignora.

Pa hopi Arubiano, esaki no ta solamente un olvido, pero un

decision consciente. Un decision cu ta duna e impresion cu Mike Eman kier a pone enfasis solamente riba su propio legado familiar, en bes di honra tambe e persona cu, segun historia, a lidera e lucha pa Status Aparte y a pone e base pa nos identidad nacional.

E peligro di esaki ta grandi. Ora historia wordo presenta selectivamente, e no ta crea solamente division, pero tambe ta manda un mensahe peligroso, cu memoria di un pueblo por wordo forma segun preferencia politico of personal.

Dios Gracia cu pueblo di Aruba no

ta lubida. Historia di Betico Croes no por wordo gestuf ni skirbi di nobo. Su contribucion ta graba den e conciencia colectivo di nos pueblo.

Si Eman berdaderamente kier a honra 50 aña di nos simbolonan nacional y 40 aña di nos Status Aparte, e mester a haci esaki cu honestidad. No cu silencio selectivo, ni cu agenda personal, pero cu respet pa tur esnan cu a contribui, specialmente pa Betico Croes cu a paga e prijs di mas halto pa e libertad y identidad cu nos tin awe.

Un celebracion sin e berdad ta un



simpel spetakel. Pueblo di Aruba merece mas cu un spetakel lidera pa Mike Eman. Aruba su historia merece respet.

MINISTER GEOFFREY WEVER TA BIAHA PA EXTERIOR PA FORTELECE ARUBA SU POSICION INTERNACIONAL Y REUNIE Y ATRAE INVERSIONISTA INTERNACIONAL PA UN PRESTAMO DI 160 MIYON USD NA MERCA Y EUROPA

Oranjestad 22 di maart – Minister di Finansa, Asunto Economico y Sector Primario, mr. Geoffrey Wever, hunto cu dos empleado di Directie Financiën, ta biaha pa New York, despues pa London y finalmente pa Amsterdam, unda nan lo reuni cu varios banco y inversionista internacional.

E bishita aki ta forma parti di un trayecto strategico pa fortalece posicion financiero di Aruba den mercado internacional. Durante 2026, Aruba tin un obligacion importante di refinancia parti di su debe nacional, cu ta suma un total di aproximadamente

506 miyon florin. Di esaki, un cantidad di cerca di USD 160 miyon na banco exterior. Esaki tin como meta pa refinancia ariba mercado internacional, prome cu e periodo di midterm elections, pa asina Aruba por cumpli cu su obligacionnan financiero na tempo.

Den e marco aki, Gobierno a dicidi pa diversifica su acceso na capital, no solamente den mercado americano, pero tambe door di amplia su presencia na Europa. E strategia aki ta enfoca riba mitigacion di riesgo y crea mas flexibilidad y opcion den mercado di capital internacional.

Tradicionalmente, Aruba a haci uso di mercado americano, pero mirando e desarroyo global y oportunidadnan den Europa, Gobierno ta considera esencial pa construi y fortalece relacionnan cu inversionistanan europeo. E meta di e bishita aki ta pa introduci Aruba como destino confiabel pa inversion, comparti informacion riba e pais, y crea confiansa cu potencial partnernan financiero.

Durante e bishita, delegacion di Aruba lo tin un agenda intensivo cu reunionnan “back-to-back” cu diferente inversionista y institucion financiero. Den e

reunionnan, lo pone enfasis riba posicion economico di Aruba, e progreso den maneho financiero, y e update positivo pa cu e evaluacion di Fitch Ratings na unda Aruba su ratings a upgrade, ademas di e proceso cu un segundo agencia di rating cu actualmente ta den desaroyo.

E dialogo aki ta crucial pa duna inversionistanan un bista claro di e estabilidad y potencial economico di Aruba, y pa fortalece e base pa participacion den mercado internacional.


Gobierno tin como meta pa completa e transaccion internacional di USD 160 miyon pa fin di april, mientras



cu aproximadamente 280 miyon florin lo wordo refinancia den mercado local. Pa logra esaki, e preparacionnan necesario ta wordo coordina hunto cu Directie Financien y Banco Central di Aruba (CBA), pa despues somete e trayecto pa aprobacion na Consejo di Minister di Reino conforme e statuut.

Cu e paso aki, Gobinete AVP-Futuro ta reafirma su compromiso pa un maneho financiero responsabel, transparente, diversifica nos economia y pa fortalece posicion economico di Aruba riba nivel internacional.

DAMA PEATON GEDAL PA CHAUFFEUR BURACHI TRAS DI STUUR



Hendrikstraat - Diasabra anochi pasa di 10'or polis y ambulance a bay direccion di Hendrikstraat, unda cu auto a alcanza un peaton.

Esnan cu a mira loke a pasa a papia di un accidente serio, debi cu e persona un dama lo a haya golpi na cabaes.

Polis a yega y mesora a busca tur informacion, y a resulta cu chauffeur di un Suzuki Swift lo tawata esuna cu e dal e dama.

E la duna su version, pero agentenan a ripara cu e tawata bebi y esaki a causa cu e la wordo deteni.


Locual e la haci lo corecto si, tawata keda na e sitio. Di e manera ey bo ta evita consecucionan serio pabo mes.

Polis di trafico tawata necesario na e sitio.

Mrs. Lacle



E YABI DI NOS CAS DEN MAN DI HULANDA: KICO HOFA TA NIFICA PA BO ??



Hopi biaha politiconan ta papia un lenguahe complica pa nos no compronde kico nan ta firma. Nan ta papia di “norma”, “deficit” y “procedura” y cu ta algo facil y simpel. Pero ban splica esaki den “placa chikito”.

1. E ehempel di e pacient sano
Imagina cu Aruba tabata un pacient hopi malo durante e tempo di Covid. Nos tabatin mester di remedi (fiansa) pa nos no muri. E ora ey nos a acepta un vitamina (e ley di LAft) pa e dokter check si nos ta recuperando.

Awor, na aña 2026, e pacient (Aruba) ta sano! Nos tin placa den

kashi (surplus) y nos economia ta fuerte. Pakico anto e gobierno kier forsa nos pa tuma quimioterapia (HOFA) pa resto di nos bida? Bo no ta duna un hende sano un remedi asina fuerte !

2. Ken ta baas den bo cas?
Aworaki, nos Parlamento (e 21 personanan cu bo a eligi) ta dicidi con ta usa/ gasta nos placa. Si mester drecha un scol of subi pensioen, nos mes ta dicidi.

Cu e ley di HOFA, nos ta entrega e yabi di nos cas na Hulanda. Nan ta bira e “baas”. Si bo kier uza bo mesun placa pa yuda bo pueblo, bo mester pidi “baas” na Hulanda

permiso prome. Si e “baas” bisa NO, bo no por haci nada.

3. E secuestro di 20 punto
Gobierno ta bisa cu si nos comporta nos mes bon, e ley aki lo desaparece. Pero den e letter chikito tin 20 condicion masha duro mes. Ta Hulanda so ta dicidi ki ora nos a cumpli.

Ta manera si bo fia placa na banco y e banco bisa bo: “Mi ta duna bo un rebaho di interes, pero mi ta keda cu bo yabi di cas pa semper, te ora MI haya cu bo ta suficiente grandi pa maneh’e bo so.” Esey no ta un fiansa, esey ta un prizon financiero.

Pa finalisa:

Nos tur kier pa Aruba su finansa ta na ordo y pa stop corrupcion. Pero bo no ta bende bo Status Aparte ni bo Libertad djis pa haya un descuento riba prestamo.

Status Aparte tabata e motor cu e Libertador Betico Croes a laga pa nos. Si nos entrega e yabi awe, nos ta bira un bishitante den nos propio pais.

Pueblo, habri bo wowo: No laga nan gaña bo cu e ta algo simpel. Esaki ta trata di ken tin e poder riba bo bida y bo placa: Abo, of un hende na Den Haag?

SALUD MENTAL NA ARUBA: ASOCIACION PSICOLOGO ARUBANO UNI (PAU) TA BATI ALARMA RIBA CRISIS CRECIENTE DEN NOS SOCIEDAD

Salud mental na Aruba ta bira cada dia mas un tema urgente. Durante hopi aña, e tema aki a kedabanda di debate publico y decision politico, apesar di e hecho cu tur problema social, violencia relacional, adiccion, stress laboral y problema familiar tin un conexon directo cu salud mental. Siman pasa, parlamentario Eduard Pieters di fraccion di PPA a sinta hunto cu directiva di Psicologo Arubano Uni (PAU), e asociacion di psicologonan di Aruba, pa tene un combersacion profundo riba e estado actual di salud mental na nos isla.

Un vision cla y contundente

Durante e encuentro, psicologo Dimitri Halley, president di PAU, a comparti un vision cla y contundente: Aruba mester cambio structural urgente den su sistema di salud mental. Segun Halley, ainda tin hopi trabou pa haci pa pone psicologia na e lugar cu realmente e merece dentro di nos sistema di salud y dentro di nos sociedad.

E meta di PAU ta simpel pero ambicioso: reuni e psicologonan di Aruba pa fortalece e profesion y sali na vanguardia di desaroyo di salud mental na nos comunidad. “Nos ta sinti cu mester bin cambianan grandi den estructura, sistema y contenido di e veld,” Halley a expresa. “Tin un falta serio den e tereno aki. Si nos ta mira honesto, tur problema social tin un relacion cu salud mental.”

Stigma social obstaculo di mas grandi

Un di e obstaculon mas grandi pa progreso den Aruba ta stigma social. Ainda tin hopi

hende cu ta kere cu ora un persona bay na un psicologo, esaki ta nifica cu e persona “ta loco”. Segun Halley, e percepcion aki ta dañino y ta stroba hopi hende di busca e ayudo profesional cu nan mester.

“Den deporte internacional nos ta wak cu e mihor atletanan di mundo ta traha cu psicologo pa fortalece nan concentracion, disciplina y rendimiento,” Halley a explica. “Psicologia ta un instrumento poderoso pa desaroyo humano. E no ta solamente pa ora problema ta grave; e ta pa guia, pa preveni y pa yuda hende crece.”

Posicion di psicologia den sistema medico

Halley tambe a lanta preocupacion riba posicion di psicologia dentro di sistema medico. Segun e, ainda tin falta di reconocimiento real pa e rol crucial cu e psicologonan por hunga den tratamiento integral di salud. Psiquiatra ta enfoca principalmente riba e aspecto biologico y kimico di e trastornonan mental, tratando problema riba nivel neurologico y farmacologico. E psicologonan, sin embargo, ta traha mas profundo riba trauma emocional, comportamiento humano, contexto cultural, espiritualidad y dinamica social.

Pa Halley, e dos disciplina mester traha hunto pa logra e cuido mas completo pa e pueblo. Sin embargo, e estructura actual no semper ta refleha e balans necesario pa logra esaki.

Modelo social como un presion grandi

Mas leu di sistema medico, Halley ta pone un pregunta mas profundo riba modelo social

di Aruba mes. Segun su analisis, Aruba di awe no ta e mesun isla trankilo di antes. Presion economico, crecimiento turistico, materialismo y ritmo di bida cada bes mas rapido ta crea un ambiente cu por afecta salud mental di comunidad.


“Nos tabata conoci Aruba como ‘One Happy Island,’” Halley a reflexiona. “Pero si nos ta honesto cu nos mes, e felicidad ey no por ta sostenibel si nos ta perde paz y trankilidad den nos bida diario. Un sociedad cu ta biba solamente pa produci mas placa y mas consumo no ta necesariamente un sociedad saludabel.”

Crecimiento di adiccion di medicamento

Un otro alerta serio cu Halley a comparti ta crecimiento di adiccion cu hopi biaha ta pasa den silencio: dependencia riba medicamento. Mientras debate publico hopi biaha ta enfoca riba droga ilegal of alcohol, el ta adverti cu adiccion na pilder prescribi ta bira un problema cada bes mas serio den sociedad. Uzo excesivo di medicamento pa p.e. ansiedad, dolor of insomnio ta creciendo y por crea dependencia dificil pa controla. “E problema aki ta creciendo silenciosamente,” Halley a indica. “Y nos mester trata esaki cu hopi seriedad.”

Pa Halley, e encuentro cu parlamentario Pieters tabata un paso importante. El a expresa su sorpresa cu un parlamentario a tuma tempo pa profundisa den e tema aki, algo cu segun el no ta pasa hopi frecuentemente.

CAMBIA PERSPECTIVA TOCANTE OBESIDAD: SA BO NUMBER Y MIDI BO PESO



30 AÑA DI LUCHA CONTRA CRIMEN FINANCIERO: FIU ARUBA TA PARA FIRME PA TRANSPARENCIA Y SIGURIDAD FINANCIERO

Diabierna mainta, Minister di Husticia mr. drs. Arthur Dowers a conmemora un momento historico: 30 aña di existencia di Financial Intelligence Unit (FIU) como departamento clave den e lucha contra crimen financiero. Durante un conferencia special organisa pa e ocasion, S.E. Gobernador di Aruba Alfonso Boekhoudt, Minister di Finansas mr. Geoffrey Wever, Minister di Infraestructura drs. Rene Herd  y Minister di Salubridad Publico drs. Mervin Wyatt-Ras y varios stakeholders y entidad relevante a bin hunto pa reflexiona riba e rol strategico di FIU den proteha nos sistema financiero, integridad, transparencia y confiansa den nos economia. Durante e conferencia, a enfatisa con Financial Intelligence Unit a evoluciona den e ultimo 30 aña pa bira un pilar indispensable den e lucha contra labamento di placa y financiamiento di terrorismo. Door di analisa transaccionnan sospechoso y comparti informacion cu instancianan relevante, FIU ta contribui activamente na proteccion di integridad di nos economia. Na maart 1996, a establece Meldpunt Ongebruikelijke Transacties (MOT), como parti di esfuerso di Aruba pa combati

crimen financiero y proteha integridad di su sistema economico. Cu e introduccion di obligacion pa reporta transaccionnan inusual, MOT a bira e punto central unda ta colecta y analisa informacion financiero importante. Den e a anan cu a sigui, MOT a fortalece su rol door di adopta standardnan internacional y ampliacion di su capacidad analitico. Tambe a integra rapidamente den cooperacion internacional, manera cu participacion den rednan global di intercambio di informacion manera Egmont Group. Na 2021, MOT a evoluciona y cambia su number pa Financial Intelligence Unit Aruba (FIU), reflehando un rol mas amplio como centro di inteligencia financiero. Awe, e institucion ta un pilar strategico den e lucha contra labamento di placa y financiamiento di terrorismo, y ta contribui directamente na estabilidad, transparencia y confiansa

den economia di Aruba. E diferente oradonan presente a reconoce e trabao di e ekipo cu a dedica nan mes pa construi un institucion confiabel, moderno y eficaz. Tambe a enfatisa cu e lucha contra crimen financiero ta un responsabilidad comparti, unda cooperacion entre sector publico y priva ta esencial. Financial Intelligence Unit lo sigui enfoca riba innovacion, fortalecimiento di capacidad analitico y cooperacion internacional, cu e obhetivo pa anticipa riesgonan y mantene Aruba na un posicion fuerte den e contexto global. E conmemoracion di 30 aña no ta solamente un momento di reflexion, pero tambe un yamada pa sigui avansa cu determinacion. Aruba ta muestra cu, cu vision y compromiso, nos por proteha nos sistema financiero y garantiza un futuro cu estabilidad y confiansa pa tur ciudadano.

Clasificados



SOLODIPUEBLO@GMAIL.COM
CEL. 585 9500





Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado: Sorteo di Merdia - March 22, 2026

 Sorteo # 4925 5995 5761 7231  FP  Sorteo # 4925 4467  X2  Sorteo # 2981 9422  Sorteo # 4925 6270 Cancer  Sorteo # 1799 086  X2	 Sorteo # 0 x Jackpot 0 x Match 4+ 0 x Match 4 0 x Afl. 12,00 110.000,-  Sorteo #7131 0 x Jackpot 5 x Match 4 133 x Afl 8,00 03-07-11-23-28 Proximo Jackpot 54.000,-	 Sorteo # 0 x Jackpot 0 x match 4 0 x Afl. 500,00 0 x Afl 50,00 0 x Afl.15,00 380.000,-  Afl. 580.000,-  Sorteo # 
--	---	--



Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado: Sorteo di Anochi - March 22, 2026

 Sorteo # 8805 5372 7301 5387  X2  Sorteo # 7849 6749  FP  Sorteo # 2554 7483  Sorteo # 6608 9686 Libra  Sorteo # 1538 149  X2	 Sorteo # 2681 0 x Jackpot 0 x Match 4+ 5 x Match 4 160 x Afl. 12,00 110.000,-  Sorteo #7130 0 x Jackpot 4 x Match 4 198 x Afl 8,00 01-07-11-18-34 Joker 27 Letter H Proximo Jackpot 110.000,-  Sorteo #7130 0 x Jackpot 4 x Match 4 198 x Afl 8,00 09-13-18-20-26 Proximo Jackpot 53.000,-	 Sorteo # 0 x Jackpot 0 x match 4 9 x Afl. 500,00 75 x Afl 50,00 99 x Afl.15,00 380.000,-  Afl 580.000,-  Sorteo # 
--	--	---

SABIDURIA DEN NOS ALEGRIA

Skirbi p pa Ruthy “Lady Ruth” Vrieswijk-Bergen

BONEIRO CAPITULO 2



Locual nos tawata falta di relata di dushi Bonaire. Isla di dushi hendenan. Isla di flamingo. Isla di amor ! Lady Ruth no por a keda sin comparti un algo mas di Bonaire su dushi hendenan !

Nos ta relata mas di nos bunita estadia na nos isla ruman Bonaire, di algun siman pasa. Despues nos lo bin cu nos capitulo 2 di nos dushi Dia di hymno y bandera. Nos no ta slow, ta hopi tema tin pa nos relata un crenchi di nan ainda. Nos falta di cubri algo di Dia di hende muhe e.o di Empowerher cu a tuma lugar na Universidad di Aruba y actividadnan cu a tuma lugar na varios lugar den e luna di Maart aki y tambe un crenchi di nos proyecto di tshirt cu poema riba dje, patronica pa ATA Aruba Tourism Authority, nan dinamico team encabesa pa e simpatico y bunita hende muhe profesional cu curason, sra. Ronella Croes cu e trabao fantastico di Marietje Printing. Pues carga un crenchi pasenshi ! Ta temanan cu no ta muri pasobra tur anja tin dia internacional di hende

muhe y tur anja tin nos Dia Nacional, dia di hymno y bandera. Bon. Awor : Ban Boneiro ban casa un bes ! Mientrastanto nos a skirbi y dedica poemanan bunita na tres dama nechi elegante y bunita di nos isla ruman Boneiro : E artista multifacetico semper inspira cu un curason profundo grandi pa su cultura Magalie Sumpter, cu su nomber artistico Magasu Lady Bratz., na su kerido mama stima Oma Pipa Raimunda Martis, e curandero stima y mas popular di Boneiro cu su poderoso oracionnan y na e bella y simpatico Shirley Martis die corantnan Extra Boneiro y e Boneriano. Y na un cabayero meymey di nan : “Ubaldo “Bubu” Anthony” un gran escritor cu amor grandi pa su bario Tera Cora, relata den su buki titula : “Esaki ta di mi “. Nan cumpleanos tawata tray otro. Lady Ruth a ricibi mas buki regalo, “Shi Helena ta conta” di e autor escritor Delno L.A.Tromp “Denchi” cu nos a ricibi di Magasu Lady Bratz, Rosita Felicia Mamadu Makubeken, Mamu MaFlodder y Jesusito. Y di

amiga colega Poeta Regina “Uchi” Frans-Antonie su colleccion di poemanan titula “ Flor di Huku” for di cual Lady Ruth a recita e poema MUHE riba dia internacional di hende muhe aki na Aruba cu a cay na masha bon tera !. Danki lieve mensén tur pa tur e bunita bukinan cu asina bunita storia y poema den nan ! Durante nos estadia di 4 dia na Boneiro nos a bishita tambe Biblioteca Publico di Boneiro na Kralendijk den Caya Amsterdam, pa entrega di algun buki di poema di Lady Ruth y tambe su ultimo buki pa mucha : Rene su dushi wega. E bukinan a wordo acepta pa Jessica De Hooge y Blanca De Leon cu amabilidad y gradicimento, hopi contento pa buki na Papiamento aunke un crenchi diferente cu e Papiamento skirbi di Boneiro.

Nos a topa y hasi conosi cu Esther y Maritza di CBS statistiek cu nan presentacion e merdia ey. Anochi nos a bishita un kampvuur publico na Delphins Hotel riba beach, na unda tur hende ta bon bini y a goza di e fantastico rapper Gerald Martinez di Boneiro y e cantante guitarista hulandes Jeroen cu ta bay bin riba e isla. Un bunita anochi ! Un di e anochinan nos a come dushi na e truck Bonaire Grill cu su tremendo chef donjo di e truck Michael Martijn cu dia 21 di juni e anja aki 2026 lo cumpli net 20 anja cu su Grill Truck,



bandi stadion den playa. Michael : Bo ta master !! Pabien for di awor cu bo logro asina grandi y bunita ! Pa su mayan den dia nos a bolbe keiro dushi asina cu mi amiga Magalie y Johan mi casa a treat nos na Kite Truck Food canti un di e bunita beachnan natural masha bunita mes. Tawata nos tres pasobra Ruthson “Yuyu” e casa di Magalie a bay Corsouw pa algun dia. Nos bon amigo ruman Christian Mejia di Aruba a recomenda nos e dushi Kite Truck Food ey maneha pa un portugues cabayero yama Andre hunto cu un sra. hulandes hopi carinoso, cu hopi amor y aprecio pa nan di dos cas Boneiro. Nos a bishita tambe e oficina di e Fundacion Historiko Kultural Boneriano FUHIKUBO den Kaya Irlanda 12, na unda su director Boi Antoine a ricibi nos buki “Rene su dushi wega” y na unda Boi a regala Johan e buki di Kuifje na Papiamento for di E aventuranan di Kuifje, e buki titula : “E asunto

di Florisol”. Boi Antoine escritor y periodista a soru pa e traduccion. Co de Koning tawata e tumado di e iniciativa y propagado, y Jan Aarnout Boer a tuma e contactonan cu e editor Casterman. Un joya di un buki ! Ken no conose e serienan di Kuifje ? Tremendo ! Nos curason yen a bolter over cu nos aprecio, amistad y amor pa nos dushi hendenan di Boneiro. Boneiru. Bonaire. Con cu bo kier skirbie, e ta keda un fuente inspirador di un cultura cu no mag bay perdi nunca ! E cuna di hendenan orguyoso tambe di ta indjan ! Cu Creador sigui drama su bendicion na abundancia di salud, bienestar, alegria y sabiduria riba e dushi isla aki. Tur nos islanan di ABC ta bunita y bendiciona ! Danki pa lesa nos relato cu amor y atencion ! Un braza grandi diki gordo di Ruthy. Pabien na FUHIKUBO cu nan tremendo trabaonan na bienestar di cultura y historia di Boneiro.”YABI DI PASADO, PORTA PA FUTURO”

FRACCION AVP TA RECONOCE E ROL CLAVE DI DEPARTAMENTO DI INTEGRIDAD FINANCIERO COMO PILAR DI BON GOBERNACION Y STABILIDAD ECONOMICO

ORANJESTAD (22 di maart 2026)–Miembronan di Fraccion di Parlamento di e Arubaanse Volkspartij (AVP) a tuma parti den e ceremonia conmemorativo marcando 30 aña di trabou di e Departamento di Integridad Financiero (FIU), un institucion cu durante tres decada a dedica su esfuerzo na fortalece integridad financiero y estabilidad economico di nos pais.

Segun informacion presenta durante e celebracion, durante e ultimo 30 aña e departamento a desempeña un rol fundamental den e lucha pa mantene integridad financiero, preveni actividad ilegal y proteha e estabilidad di sistema economico di Aruba.

Fraccion di AVP ta considera e labor consistente y profesional di e departamento como un ehempel concreto di con institucionnan fuerte y competente ta contribui directamente na confianza den gobierno, disciplina financiero y crecimiento economico sostenibel. Miembronan di fraccion ta balora institucionnan publico cu ta traha cu responsabilidad y transparencia, alavez gradici y duna palabranan di felicitacion na Sr Angelo Brete y su team y tur profesional cu a yuda desaroya MOT y FIU den locual e ta awe.

Den e vision di Gabinete AVP–Futuro, bon



gubernacion no ta solamente un concepto teorico, sino un compromiso practico cu ta basa riba institucionnan solido, control financiero efectivo y respet pa regla y procedimentonan. E Departamento di Integridad Financiero ta representa precisamente e tipo di institucion cu ta sostene e fundeshi di un estado moderno y confiabel.

Fraccion di AVP kier expresa su profundo aprecio pa tur empleado y profesional cu durante añanan a dedica nan conocimiento y integridad personal pa mantene e reputacion financiero di Aruba fuerte, tanto localmente como internacionalmente. E trabou di e departamentu ta contribui na crea un clima economico stabiel, cual ta esencial pa inversion, empleo y bienestar social



di nos comunidad.

Ademas, fraccion di AVP ta enfatisa cu fortalecimiento continuo di mecanismonan di control financiero y supervision responsabel ta un elemento central den su enfoke di gubernacion. Institucionnan manera e Departamento di Integridad Financiero ta muestra con claridad cu

disciplina, transparencia y profesionalismo ta instrumento indispensable pa proteha interes di pueblo y pa mantene estabilidad economico na largo plazo.

Finalmente, Fraccion di AVP ta reafirma su compromiso pa sigui apoya institucionnan cu ta traha pa integridad,


responsabilidad y estabilidad economico. Den e cuadro di e vision di Gabinete AVP–Futuro, inversion den bon gubernacion y institucionnan fuerte ta keda un prioridad strategico pa garantisar un Aruba sigur, confiabel y prospero pa tur su ciudadano.

FILOMENA COLLEGE MAVO

SU OPENDAG 2026



E siman cu a pasa, Filomena College MAVO na San Nicolas a tene su acostumbrado opendag. E dia aki tur mayor y futuro alumno tabatin e oportunidad di cera conoci cu e maestronan di Filomena Mavo y cu nan forma di duna les. E tema tabata: “Bo ruta, bo talento, bo futuro.” Banda di cera tur materia cu éxito, e scol aki tin e concepto unico di saca e talento maximo riba tereno di tur deporte y arte creando, di e forma aki, un individuo completo. Directorado di Filomena Mavo ta gradici na prome lugha tur mayor y alumno cu a acudi na e opendag 2026 y ta spera cu tur presentacion tabata na agrado di un y tur. Tambe tur cabesante di scol basico cu a coopera cu nos e aña aki. N’e sosten ricibi di tur maestro, personal, alumnonan cu ta miembro di Kiwanis Club of Filomena, Tito Bolivar di Artisa Aruba y Prensa di Aruba: Masha Danki y sea bon bini na Filomena College MAVO.



Clasificados




SOLODIPUEBLO@GMAIL.COM
CEL.585 9500 

AWE NOCHI TIN WEGA GRANDI DEN DOMINO!



Calabas/Kudawecha - BREAKING NEWS BREAKING NEWS! NOTICIA DI ULTIMO ORA! Si, shonnan amante di domino estilo “kibra stoel”, awe ultimo ora a cay noticia na mesa di redaccion cu awe nochi, diasabra 21 di maart, cuminsando pa 8’or di anochi, lo bay tin un sambombaso di encuentro di domino entre dos ekipo cu pa hopi tempo caba ta rivalnan eterno! E lugar dje bataya aki claro lo ta n’e incomparabel y sumamente distinguido Domino Square Garden, aya net n’e grens entre

Kudawecha y Calabas. Esaki pa añanan largo caba conoci como e unico palacio di pega piedra caminda entrada semper ta gratis y durante halftime e pasapalonan ta skeiro rond completamente por nada! Cua t’e dos ekiponan cu lo enfrenta otro awe ’nochi? Nada menos cu e gang di Biba Lekker DT, kendenan lo durf di enfrenta e “Chuck Norrisnan” di Sero Blanco DT! Un berdadero sambombaso caminda sigur sigur un tabla lo bula bay halto. Dos ekipo cu ta igual den caliber halto di domino y cu a dicidi di midi forsa un biaha mas contra



otro den nan rivalidad eterno. Pues shonnan, bini uno bini tur, awe 21 di

maart, cuminsando pa 8’or n’e mundialmente famoso Domino Square Garden, e

bataya entre Sero Blanco DT contra Biba Lekker DT! Yegaaa!

CAMBIA PERSPECTIVA TOCANTE OBESIDAD: SA BO NUMBER Y MIDI BO PESO



7 ALIMENTO CU POR MEHORA BO BEIS

E alimentonan cu bo ta come no solamente ta determina con bo ta zit eruit, sino cu tambe ta influi bo pensamento, emocion y accionnan.

Hopi ta e alimentonan cu por desahusta bo sistema nervioso, treciendo como consecuencia mal beis, cansancio, ansiedad y depresion.

Purba e siguiente alimentonan cu por mehora bo humor. P'esey, si bo a nota cu semper bo ta di mal humor of bo ta sinti un disgusto.

Taunopcion massaludabel, economico y simpel na luga di usa remedi. Solamente tene na cuenta cu si bo emocionnan no ta stabilisa, ta un bon idea pa bishita un psicologo. Algun biaha e problemanan cu no tin di haber cu loke nos ta come, sino cu e hendenan cu ta rond di nos y e situacionnan cu nos ta biba aden.

1. Cacao of chuculati puro
E prome di e alimentonan cu ta mehora bo humor, ta cacao. E tin un efecto estimulante di felicidad, debi na e teobromina. E kimico aki ta yuda na:

- Aumenta e nivelnan di serotonina y dopamina den e organismo
- Ta relaha e sistema nervioso
- Ta disminui e estadonan di ansiedad y depresion

Cacao tambe ta contene triptofano, un kimico cu ta fomenta e liberacion di serotonina. Pa tur su beneficiannan, nos ta recomendabo come un pida repi di chuculati puro



of cacao pa dia, pa asina mehora e estadonan di depresion y ansiedad.

Lo unico cu bo mester vigila ta cu e chuculati scogi, ta di un contenido halto di cacao. Idealmente e mester ta riba 65%.

2. Noot of nechi

E di dos di e alimentonan cu ta mehora bo beis ta noot of nechi. E ta aporta na e organismo acidonan graso omega 3, cu esaki no ta produci door di su mes. Ora cu bo curpa no obtene suficiente omega 3, e por dreña den estadonan depresivo. Nootnan tambe ta contene triptofano, di cual ya nos a menciona caba.

- Nos ta recomenda consumi 5 noot pa dia pa asina mantene un beis mas stabil.
- Corda cu bo por añadi nan na bo batidonan, na bo desertnan of simplemente come nan como colacion.

3. Bacoba

Bacoba ta otro di e alimentonan cu ta mehora bo beis y cu bo tin cu inclui den bo dieta diario of por lo menos dos biaha pa siman.

Su beneficio na bo



emocionnan ta debe na e contenido halto di vitamina B6. Esaki ta interveni den e proceso di transformacion di e compuestonan proteicos di serotonina.

Ademas, door cu e ta contene acido folico, vitamina C y fibra vegetal, e ta mehora bo defensanan.

4. Simiya di sesamo

E simiyanan aki ta un di e alimentonan cu ta mehora bo beis pasobra e ta aporta na treonina.

Esaki ta un aminoacido esencial cu e organismo no por produci y sintetisa di su mes di forma natural.

Ora cu tin nivelnan abao di treonina, bo por experiment tristesa cronico.

- Pa obtene e nutriente aki, nos ta recomendabo inclui un

telep di simiya di sesamo den bo saladanan of usa su azeta como parti di bo platonan.

5. Salmao y otro pisca

Otro di e alimentonan cu ta mehora bo beis pasobra nan ta rico den acidonan graso omega 3, ta salmao, tuna of sardin.

Esakinan ta incidi directamente den e

nivelnan halto di salo y di BPA, tambe conoci como bisfenol.

6. Alimentonan rico den fibra

Alimentonan rico den fibra soluble ta yudabo na cambia e estado di animo ora cu esaki ta debe na e alteracionnan den bo nivelnan di suco den sanger.

Si bo ta diabetico, controla bo nivelnan corespondiente. Corda cu e glucose eleva no solamente ta afecta e funcionamiento di bo organonan interno: tambe lo ponebo experimenta diverso emocionnan negativo den cuestion di minuut.

Ora cu bo ta sinti cu esaki ta sosodiendo, realiza un revision di glucose pa determina si esey ta e problema.

7. Carni cora magro

E ultim di e alimentonan cu ta mehora bo beis ta carni magro. Esakinan ta rico den acido linoleico, un vet natural cu ta yuda combati stress y e acumulacion di vet den curpa.

E carninan aki tambe ta aporta na hero y omega 3 cu ta yuda mehora e salud cerebral.

- Ademas, ta hopi recomendabel cu ora di cushina e carninan, haci'e cu e menor cantidad di salo y vet posibel. Asina, nos lo ta consumiendo e producto sin cosnan añadi y nos lo evita otro problemanan asocia. Manera por ehempel hipertension of aumento di peso.

eficiencia di e movimiento di algun neurotransmisor, cual deficiencia por provoca estadonan depresivo.

- Ta recomendabel inclui por lo menos un porcion di e piscanan aki na bo dieta semanal.

- Si ta posibel, inclui nan tres biaha pa siman compana pa berdura.

Sigura cu e pisca cu bo cumpra ta di bon calidad y liber di contaminante. Esaki ta specialmente importante cu salmao, ya cu algun specimen obteni di criaderonan ta alimenta cu kimico cu por afecta bo humor.

Si bo ta opta pa consumi tuna, percura pa eligi e opcionnan den pidanan natural. Aunke e ta hopi economico come tuna di bleki, esaki ta contene

FRACCION DI AVP ORGUYOSO Y GRADICIDO PA STAMPIA DEDICA NA LEGADO DI HENNY EMAN

ORANJESTAD (22 di maart 2026) – Fraccion di Parlamento di e Arubaanse Volkspartij (AVP) kier expresa su sincero orguyo y profundo gratitud pa e iniciativa di Post Aruba NV pa presenta un stampia conmemorativo na honor di nos ex-Ministro Presidente y lider historico, Jan Hendrik Albert 'Henny' Eman, precisamente riba e fecha di su natalicio.

E presentacion di e stampia aki ta un acto simbolico di gran balor historico y nacional. E ta reconoce e contribucion extraordinario cu Henny Eman a brinda na Aruba, specialmente den e lucha pa logra y consolida nos Status Aparte, un milestone cu a marca e rumbo di nos pais y a fortalece nos posicion como un nacion autonomo den di Reino Hulandes.

Pa Fraccion di AVP, e reconocimiento aki no solamente ta honra un lider politico, sino tambe ta celebra e vision,

determinacion y liderazgo cu a forma e fundeshi di e Aruba moderno. Henny Eman a dedica su bida na sirbi pueblo, defendiendo autonomia, democracia y estabilidad politico, balornan cu ainda awe ta guia nos trabou como partido y como representantenan di pueblo.

Fraccion di AVP kier tambe resalta cu e obra di arte cu ta forma e base di e stampia conmemorativo a wordo crea pa artista local Nigel Matthew, un talento creativo di nos mes comunidad, cu a logra captura di un manera digno e presencia y legado di Henny Eman. E participacion di un artista local den un proyecto di importancia nacional manera esaki ta muestra con claridad con cultura y historia ta bay man den man.

Durante e acto oficial di presentacion y develo di e stampia, miembronan di Fraccion di AVP a tuma parti na e ceremonia, compartiendo e momento historico hunto cu famia, autoridad y otro invitadonan presente.

E stampia conmemorativo ta sirbi como un recordatorio permanente di e legado di liderazgo responsabel y patriotismo cu Henny Eman a representa. E ta un simbolo pa generacionnan actual



y futuro pa sigui traha cu compromiso y amor pa nos pais.

Fraccion di AVP kier felicita y gradici Post Aruba NV pa e iniciativa digno aki, cual ta contribui na preservacion di nos memoria historico y na fortalecimiento di nos identidad nacional. Nos ta anima tur ciudadano pa reconoce y aprecia e herencia politico y historico cu lidernan manera Henny Eman a laga pa Aruba.

Finalmente, Fraccion di AVP ta reafirma su compromiso pa continua honra e legado di nos lider historico, trahando cada dia pa un Aruba fuerte, autonomo y prospero pa tur su ciudadano.



SOPi DI LETRANAN

M	R	N	I	F	X	N	P	M	O	S	E	S	B	C	V	N	W	N	M	S	G	H	J
E	R	K	H	Z	M	B	E	F	O	R	E	R	R	S	H	U	M	O	D	T	R	S	P
M	E	E	J	Q	S	S	E	N	K	R	A	D	Q	X	G	R	S	E	L	D	T	E	S
O	W	K	C	O	N	F	E	S	S	E	D	M	L	R	S	O	I	E	L	X	H	L	I
C	O	A	G	O	F	J	E	A	M	O	N	G	Z	Y	B	R	W	S	B	I	G	F	C
E	P	P	Y	R	Y	W	C	O	M	E	T	H	W	V	C	D	T	B	T	W	I	M	B
B	B	S	M	R	E	A	I	T	M	N	C	O	Y	L	E	V	I	T	E	S	M	J	L
X	E	E	H	L	O	C	J	T	P	J	R	O	A	S	A	Y	I	N	G	E	J	E	O
U	G	L	G	I	V	L	E	O	H	L	G	Z	M	H	Z	K	D	S	P	E	U	S	O
H	I	Q	A	O	N	H	G	I	D	O	G	Y	O	P	Z	P	T	L	R	O	G	U	D
F	N	P	T	S	T	E	G	X	V	R	U	Q	R	T	R	W	N	U	E	K	C	S	K
T	N	S	D	U	K	T	T	D	V	E	G	T	Y	I	H	E	S	C	L	H	R	Z	V
E	I	W	R	Y	C	E	E	H	I	L	D	D	E	O	V	A	H	I	M	E	E	N	Y
R	N	T	L	K	C	O	D	N	T	K	M	S	S	I	L	D	G	E	H	W	U	B	T
E	G	M	O	O	Z	X	B	Q	A	I	T	E	G	E	J	H	K	T	N	R	Y	D	H
C	F	U	L	N	E	S	S	S	E	S	A	S	M	C	T	P	A	S	I	D	J	H	I
O	Y	M	R	N	W	R	E	T	F	A	Y	S	K	A	H	F	J	C	N	N	E	E	N
R	D	D	E	R	A	L	C	E	D	K	C	I	K	R	S	S	E	N	T	I	W	D	G
D	G	E	I	P	R	E	F	E	R	R	E	D	H	G	F	E	V	E	I	L	E	B	S
C	R	A	D	K	D	E	N	I	E	D	O	A	E	L	I	A	S	X	B	D	B	W	X

- AFTER
BEGINNING
BOSOM
CRIED
ELIAS
GLORY
LIGHT
PRIESTS
SHINETH
WITHOUT

AMONG
BEGOTTEN
CHRIST
DARKNESS
FATHER
GRACE
MIGHT
RECEIVED
SPAKE
WITNESS

ASKED
BEHELD
COMETH
DECLARED
FLESH
JERUSALEM
MOSES
RECORD
THINGS
WORLD

BECOME
BELIEVE
COMPREHENDED
DENIED
FULNESS
JESUS
POWER
SAITH
TRUTH

BEFORE
BLOOD
CONFESSED
DWELT
GIVEN
LEVITES
PREFERRED
SAYING
WHOSE

SUDOKU

5		9				4		
7		8	3		4	9		
6		1				7	3	
4	6	2	5					
3	8	5	7	2	1	6	4	9
1	9	7	4		8	2		
2			1					4
		3		4			8	7
	7			5	3			6

8								
		3	6					
	7			9		2		
	5				7			
				4	5	7		
			1				3	
		1					6	8
		8	5				1	
	9					4		



Oracion di dia

UN FELIZ DIA Y CU DIOS BENDICIONA BOSO RICAMENTE

”P’esey obedece y sigui tur cos cu nan bisa, ma no haci manera nan ta haci si! Pasobra nan mes no ta haci loke nan ta bisa. Mateo 23,1

Rumannan e Palabra di Dios ta siña nos cu nos mester ta atento, hopi hende ta papia bunita pero nan bida ta musta e contrario. Nos mester purba sigui e bida di Hesus.

E no ta facil pero e recompensa ta Bida Eterno. Awo cu ta tempo di Cuaresma ban pidi Hesus laga nos cana hunto cu nE.

Si nos conoce su Palabra ban bibe. Ban cana cu Hesus, ora nos trompeca pidi’E lanta nos bek. Bunita ta cay y lanta bek y reconoce cu nos a comete un eror y pidi pordon. Sea humilde.

Oracion: Dushi Hesus nos kier ta humilde, cana den Bo pasonan. Guia nos y musta nos cua ta e obra cu Bo kier nos haci den e Cuaresma aki. Laga nos papia y ta un ehempel di Bo den obra y nos bida diario.



STATEN VAN ARUBA

DOORGANG OPENBARE BIJeenKOMST OP 19 MAART 2026 OM 14:00 UUR N.M. IN DE VERGADERZAAL VAN DE STATEN VAN ARUBA

TE BEHANDELEN ONDERWERP

Agenda:

Gedachtewisseling met 13 vakbonden inzake hun standpunt betreffende het conceptvoorstel van rijkswet tot het bereiken van houdbare overheidsfinanciën Aruba (Rijkswet houdbare overheidsfinanciën Aruba)

De Plv. Griffier,

mw. J.S. Briceño, MSc.

DATA DI COMUNIDAD TA APORTA CU INFORMACION CLAVE RIBA E SOBREVIVENCIA DI NOS SHOCO NA ARUBA

ORANJESTAD - E encuesta Radar di Shoco di Directie Natuur en Milieu (DNM), ta un iniciativa unda comunidad ta participa (citizen science) den monitor nos parhanan endemico di Aruba. Desde 2020, comunidad di nos isla a contribui cu 87 reportahe, loke ta brinda un mapa importante di unda e Shoco (Athene cunicularia arubensis) ta prospera y unda e ta na peliger.

Nos tin un comunidad activo y vigilante

E resultadonan di e encuesta ta duna indicacion cu nos pueblo ta duna aporte y cooperacion pa yuda colecta data. Di e reportahenan registra entre 2020 y 2026:

- 83% di e participantenan a logra observa por lo menos un Shoco.

- 78% di e reportahenan a identifica bida den e neishinan, pues neishi activo cu yiu.

- Pareha Shoco ta prevalece: E observacion mas comun tawata cu tin presencia di un par di Shoco (38% di e reportahenan), loke ta un señal positivo pa e proceso di reproduccion.

Unda e Shoco ta b Segun data di e proyecto Radar di Shoco, e Shoconan cada bes ta observa den cercania y banda di areanan urbano. Frecuentemente a reporta observacionnan banda di:

- Scolnan y veldnan

di deporte: areanan unda tin hopi actividad di Shoco ta unda tin un tereno habri y cu seronan chikito di santo.

- Mondi: areanan di mondi situa tras di barionan residencial.

- Neishi artificial: a nota Shoco den e neishinan traha pa hende riba terenonan di scol, unda a observa cu e Shoconan a bay haci uzo di e 'artificial burrows'.

Menasanan critico y preocupacion di comunidad

Aunke e presencia di Shoconan chikito y hubenil ta indicacion cu tin reproduccion exitoso, e reportahe ta enfatisa tambe peligronan significante. Comunidad a expresa preocupacion tocante:

- Perdida di habitat: rosamento di tereno y construccion acelera ta keda e menasa principal pa e neishi di Shoco.

- Interferencia humano: trafico pisa cerca di e neishinan y desordo di actividadnan recreativo por stroba e Shoconan durante nan temporada di broei.

- D e s t r u c c i o n di neishi: na un forma preocupante, tin varios reportahe cu ta menciona e desaparicion of destruccion intencional di neishinan registra.

E Shoco ta mas cu simplemente un parha; e ta simbolo nacional di Aruba.

E echo cu ciudadanonan



ta raportando e observacionnan aki activamente ta demonstra un deseo profundo pa proteha nos herencia natural.

Con abo por yuda E encuesta Radar di Shoco ta disponibel via e website di DNM, www.dnmaruba.org pa tur habitante sigui actua como e "wowo y orea" pa proteccion di e Shoconan. Door di raporta loke bo ta mira, comunidad ta yuda cu data y informacion, y asina yuda identifica areanan cu mester di accion.

Raporta Pa raporta un Shoco of

un neishi activo, por tuma contacto cu DNM via info@dnm-aruba.org, yama 5841199 of uza e plataforma oficial di Radar di Shoco. Por haya e 'link' pa raporta Shoco y nan neishi riba nos website www.dnmaruba.org click riba encuesta, y ta click riba 'Registra neishi di Shoco', asina ta haya e Radar di shoco pa yena tur data.

E Shoco ta un especie protegi pa ley na Aruba y ta reconoci como Aruba su simbolo nacional. E parhanan aki cu ta traha nan neishi den tera, ta endemico (unico) na Aruba

como un sub-especie y tin nan rol den e ecosistema local. Ban yuda pa su conservacion y proteccion, raporta cerca DNM ora observa nan.



E BON NOTICIA NA E SECTANAN CU NO TA ACEPTA MAMA MARIA, CU NO TA HONRA Y CU NO TA STIMA E MAMA DI HESUS

Den Bijbel Genesis 3: 14-16, Dios Tata a bisa na e colebra satanas: “Lo Mi trece enemistad entre abo y e muher, entre bo descendiente y entre e descendiente di e muher. E muher cu su descendiente lo trapa riba bo cabes y lo bo lastra bao di su pia.” Akinan e muher ta Maria, cu Dios Tata a escoh’E pa e bira Mama di E Salvador. Maria Su descendiente ta, Cristo-Hesus y tur esnan den Cristo-Hesus Su Iglesia. E descendiente di e colebra satanas ta esnan cu no ta acepta, cu no ta honra y cu no ta stima Maria y cu ta persigi e descendientenan di Maria den Cristo-Hesus Su Iglesia. Den Bijbel Revelacion 12: 17: “Anto e dragon a rabia contra e muher y e’l a bai hasi guerra na e demas yiunan di e muher.” Akinan e diabel tin rabia riba Maria y e diabel ta persigi y ataca e yiunan di Maria den Iglesia. Den Bijbel Lucas 1: 41-43, Maria ta bishita Su prima Elizabeth y Elizabeth a keda yena cu Spirito Santo y a bisa: “Di unda mi ta merese e honor cu Mama di mi Senjor ta bishita mi?” Maria ta wordo yama Mama di Dios, pasobra Su Yiu Hesus ta E di dos Persona di E Santisima Trinidad. Y den Bijbel Huan 20: 28, akinan Apostel Thomas ta expresa na Hesus: “Mi Senjor y Mi Dios.” E palabra Senjor

ta significa Dios, pesey Maria ta Mama di Dios. Den Bijbel Lucas 1: 46 – 49; “Maria a bisa: Mi curason ta alaba Senjor, Mi Spirito ta alegre den Dios Mi Salvador, pasobra E a mira riba Su humilde sirbidora. For di awor, tur generacionnan lo jama Mi felis. Di berdad E cu ta Todopoderoso, a haci na Mi, Su obranan milagroso y Santo ta Su nomber.” Akinan tur e pueblonan di mundo lo honra y lo venera Mama Maria. Den Bijbel Huan 19: 25-27, akinan Hesus na Crus klaba a bisa: “Mama, ata bo yiu ey nan y despues E’l a bisa Huan: Ata bo Mama ey nan.” Akinan Hesus ta ofrece nos Su Mama, pa nos stimel’E, pa nos honrel’E y pa nos acepta Maria como nos Mama Celestial. Manera cu e Apostel Huan a acepta Maria como su Mama y e Apostel Huan ta representa e Iglesia di Cristo-Hesus, pesey Maria ta Mama di Iglesia. Den Bijbel 1 Reynan 2: 19-20, ta bisa: “Ora cu Betsabe, e mama di Rey Salomon a drenta den e sala di e Rey, pa papia cun’e ariba asunto di Adonias, e Rey a lanta pa ricibi su mama y a buig su dilanti. Despues e’l a bai sinta riba su trono y a duna ordo pa nan trece un stoel di trono pa su mama, e mama a sinta na man drechi di su yiu Rey Salomon y a bisa su yiu: Mi kier a pidi bo

un fabor chikito, mi no ta spera cu bo lo nenga mi. Rey Salomon a contesta: Mi mama, pidi mi loke bo kier, lo mi no nenga bo.” Akinan e mama di Rey Salomon a haya un trono, pa sinta na man drechi di su yiu Rey. Hesus ta Rey di Universo, den Bijbel Lucas 1: 32 – 33, na unda e Angel Gabriel a anuncia na Maria: “Senjor Dios lo duna Hesus e trono di Su antepasado Rey David y te den eternidad lo E ta Rey di e descendientenan di Jacob y Su Reino lo no tin fin.” Cristo-Hesus ta Rey

di Universo y ta sinta riba Su Trono den Gloria. Awor, lesa Bijbel Revelacion 12: 1, ta bisa: “Un senjal grandi a aparece na Cielo: un Muher bisti cu solo, cu luna bao di su pianan y riba su cabes un corona di diesdos strea.” E Muher bisti di solo ta Maria y e corona di diesdos strea ta simbolisa, e oficio Real den Reino di Cielo. E significacion di solo, luna y streanan bao di Su pianan, den Bijbel Genesis 37: 9-11, akinan e Profeta Jozef ta sonja di mira con, solo, luna y streanan ta buig su

dilanti y esaki ta simbolisa, Reinado y Autoridad. Awor nos ta compronde, cu Mama Maria ta Reina di Cielo y di Tera y Mama Maria ta sinta na Su Trono na man drechi di Su Yiu Hesus. Hesus Rey di Universo, lo no nenga Su Mama fabornan, mescos cu Rey Salomon no a nenga Su mama fabornan. Un mensahero di Dios. Scirbi pa Seferino Tromp Koyari 13-D Tel. 5931157/5870048 ID. 57.11.22.40 E-mail: etajuni@yahoo.com

HACI PAGO DI ABONEMENT ONLINE

TA POSIBEL:

**APRECIABLE CLIENTELA, SI BO TA DESEA DI
HACI E PAGO DI ABONEMENT ONLINE,
E TA POSIBEL:**

ESAKI TA NOS CUENTA:

SUNMAX PRINTERS - STA. CRUZ 110

BANCO: RBC

NUMBER DI CUENTA: 7700000100152447

**DI ANTEMANO,
MASHA DANKI.**

SOLO DI PUEBLO

